



Jumat, 13 Mei 2022

Ogen: Esekiel 37:1-14



Nggeluh Mulih



Ngeluh bas pembuangan, ngeluh bas ketertekanan. Pembuangan e labo kentisik ngenca man dalanen, tapi erpuluh-puluh tahun. Waktu sicukup gedang enda erbahanca kegeluhen bangsa Israel reh kotena. I tengah-tengah pembuangan igejapken maka perbeben e reh buena, seh maka lanai ia ngasup natap kempak dengen mindo penampat man Dibata. Erdandanken si e Dibata ngerana man Esekiel ngataken maka bangsaNa e desken tulan-tulan si enggo kerah bas kuburen. La terjeng kerah, tapi enggo kerah kel, lanai lit gegeha tempa lanai erguna. Biasana tulan si enggo kerah kel biang pe lanai pet. Bage me anding-andingen kerna kegeluhen bangsa Israel bas taneh pembuangan.

Iidah Dibata kegeluhen bangsaNa e maka suruhNa nabina guna erberita/ ernubuat kerna kata Dibata. Dibata e erdaulat, ngasup mpegeluh mulihi tulan-tulan e alu namaken daging, urat ras kesah. Nubuat e ituriken Esekiel, minter lit perubahen si jadi nandangi tulan-tulan ndai ersada ras daging urat ras i bereken me kesah seh maka banci nggeluh mulihi.

Kai antusenna enda man banta. Ngeluh bas pembuangan eda e me ngeluh bas masa-masa lanai erpengarapen. Buena perbeben geluh piahna pengarapen pe lanai lit. Kai banci si lakoken? E me megiken kata Dibata. Kata Dibata e mereken semangat si mbaru, ngerakut mulihi si enggo sirang ndube dengen mereken gegeh segelah banci ndalani kegeluhen. Dibata ngenca ngasup mereken kesah e man banta. Ia me simereken pengarapen-pengarapen baru nalangi pintu kuburen singolangi kita nggeluh bas semangat si mbaru.

Kuncina e me megiken sora Tuhan, rembak ras Tuhan. Selaku Moria, tetaplah erpengarapen man Tuhan. Tetaplah sipepaguhi kiniteken ras pengarapenta arah erpaksa teneng alu ratur, ngoge kataNa dengen ngikuti kegiatan-kegiatan si mbangun kinitekenta. Adi kita ngeluh bas pengarapen, tek kita maka kita pe ngasup mabai teman-temanta ngeluh bas pengarapen.